

REGIONAL NEWS BULLETIN

HEADLINES (EVENING)

- 1. Finance changtu Chief Minister Pu Lalduhoma’n kum 2025-26 Financial Year-a Mizoram sum ruahman cheng vaibelchhe 15,198 leh nuai 76 chu Assembly session-ah a pharh.
- 2. Mizoram tana kum 2025-2026 sum ruahmanah Bana Kaih atana cheng vbch 350 sorkarin a dah chu beitham an tih thu eptu MLA ten an sawi.
- 3. Prime Minister Narendra Modia chuan industry ten au MSME ten ram eibar hmasawnna atana an thawhhlawk thu a sawi.
- 4. Maharastra sawrkara Food, Civil Supplies and Consumer Protection Minister Dhananjay Munde chu vawiin khan a nihna atangin a bang.

<><><>

BUDGET

Finance changtu Chief Minister Pu Lalduhoma’n kum 2025-26 Financial Year-a Mizoram sum ruahman cheng vaibelchhe 15,198 leh nuai 76 chu Assembly session-ah a pharh.

Kum kalta 2024-25 budget aiin kumin budget hi cheng vbc 786 nuai 64 in a tam zawk a, a punna hi za zela 5.4 a ni a, Budget Estimate 2024-25 zinga cheng vaibelchhe 13,835 leh nuai 42 chu house a pawm ngai a ni.

Pu Lalduhoma hian kumin Financial Year kal laia sum hman ruahman belhna Supplementary Demands for Grants 2024-2025 cheng vbc 3,512 leh nuai 33 chu a pharh nghal bawk a. Sorkar inrelbawlina senso, sorkar hnathawk hlawh leh pension bakah hmasawnna thawhna tur atana sum hman tur ruahman (revenue expenditure) hi cheng vbc 12,540 leh nuai 20 a ni a. Budget pumpui aṭanga chhutin za zela 82.51 a ni. Mipui hmasawnna atana sum ruahman (capital expenditure) atan cheng vaibelchhe 2658 leh nuai 55 dah a ni a, hei hi sum ruahman zawng zawng aṭanga chhutin za zela 17.4 a ni.

Chief Minister chuan sawrkar kum hmasa kum 2024 leh 2025 inkarah sum renchem, sum dinhmun in sawh nghehna kum an hman avangin nghawng tha tak tak a nei a ti a, India Sawrkar-in hmasawnna kawng atana a hmathlir, Viksit Bharat ti hlawhtling turin theihtawpin an inbuatsaih tih sawiin state in chhiah atanga sum a hmuh ang ang leiba rulh nan an hmang a, sum leh pai enkawl kawngah harsatna tawk deuh mahse hma an sawn niin a sawi.

Chief Minister chuan Sawrkarin an dinhmun dik tak aia sang GSDP figure an nei thin chu tha anti lo a ti a, Tlahniam ta angin lan phah dawn mahse huaisen taka figure dik thei ang ber hmanga inteh a, nihna dik phochhuah an duh avangin kum 2024-25 GSDP Cheng Vbc 48037 leh nuai 52 chu Vbc 34003

leh nuai 27 ni zawk tura chhût chhuah a ni ta a, a hniamna Chu cheng Vbc 14034 leh nuai 25 ani tih sawiin figure dik zawk an hman tak avangin a inthlak tih a sawi.

Pu Lalduhoma chuan Mizoram economy than chhoh dan tarlangin sawrkar kum kal meka an thanna chu za zela 10.05 a ni a, sawrkar kum lo awm turah za zela 10.21 a thang tura beisei an ni tih sawiin Kum 2025-26 chhunga fiscal deficit chu Cheng Vbc 1651 leh nuai 68 ani dawn a ti a, hei hi GSDP atanga chhûtin zaa 4.57 a ni tih a sawi bawk.

<><><>

CM - HANDHOLDING

Chief Minister Pu Lalduhoma’n kum 2025-26 chhungin Bana Kaih hnuaiah Cheng Vbc 350 an ruahman a ti a, kuthnathawktute chawikanna tura tangkai taka hman an tum tih a sawi.

Vawiina Mizoram budget a pharh zawh hnuah Assembly House Annex Building, Conference hall ah thutharthehdarh tute kawmin Pu Lalduhoma chuan sawrkar kum kal mekah sawhthing chu Mizoram sawrkarin kuthnathawktute a leisak vek dawn a ti a, kumina tharchhuah chu hmai awmlo in lei an tum tih sawiin tuna la hralh mai lo te pawhin lo cho sa loa, a leituten an sawhthing an lei hun tur lo nghak hram turin a duh thu a sawi a, kuthnathawktute hmasawna tur atan sawrkar kum tharah pawisa tam tak an dah tih a sawi.

Chief Minister chuan thlai thar 4 – sawhthing, hmunphiah, aieng leh hmarcha chu sawrkar kum tharah an chhunzawm leh dawn a ti a, hmachhawp thui tak kuthnathawktute tan an siam tih sawiin thlai dang lei tumna an la nei hrihlo a ti a, Bana Kaih hnuaia budget-a cheng vbch 350 an dah chu tun sawrkar kum kal meka hemi puala an dah Cheng Vbc 200 aiin zaa 75% in a sang tih a sawi bawk.

<><><>

OPPSN REACTION

Mizoram tana kum 2025-2026 sum ruahmanah Bana Kaih hnuaia cheng vbch 350 sorkarin a dah chuan kuthnathawktute mamawh zualpui a chhawk theih an ringlo tih eptu MLA ten an sawi.

Eptu Leader Pu Lalchhandama Ralte chuan Akashvani zawhna chhangin, Finance Minister Pu Lalduhoma'n vawiina Mizoram budget a pharh zawh hnu lawkah nidang ang lo taka Bill putluh a nih avangin budget chu an la zirchiang hman lova, Budget-a ruahmanna an siamte chu a tha nge tha lo tih an la sawi thei rih lo tih a sawi a, Bana Kaih hnuaia cheng vbch 350 dah chu beitham hlea a hriat thu a sawi.

BJP MLA Dr K Beichhua pawhin vawiina Mizoram Budget chu an pharh chauh a, zirchianna a la awm loh avangin sawi theih a la nei lo tih a sawi a, hetihruah hian Bana Kaih hnuaia cheng vbch 350 dah chu ho tham a tih thu a sawi a, Chief Minister Pu Duhoma'n Year of Consolidation an hman chhungin leiba a tlakhniam thu a sawi a, GSDP percent zawngin tlahniam mahse a dik zawk an hmang tawh ti-a a sawi chu thil chiang tak a ni lova a hriat thu a sawi bawk a ni.

Congress MLA Pu Ngunlianchunga pawhin Mizoram Budget chu a kawm bak an la hmuh loh avangin ngaihdaan a nei rih lo tih a sawi a, Bana Kaih hnuaia cheng vbch 350 dah chu engmah tham lo ni-a a hriat thu leh a hminga an dah ve mai mai ang a tih thu a sawi ni.



CM –PRESS CONFERENCE

Chief Minister Pu Lalduhoma’n tun sawrkar kum kal mekah lei rem rap tura an inbuatsaihna atan Year of Consolidation a puan hnuah State leiba cheng vbch 1003 leh nuai 94 laiin a tlahniam tih a sawi.

He thu hi vawiina Assembly thutkhawma kum 2025 – 2026 inkara Mizoram budget tur a pharh na ah sawiin Chief Minister chuan sawrkar kum kal mek 2024-25 (Budget Estimate) ang chuan state leiba chu za zela 29.22 niin, leiba tling khawm chu Cheng Vbc 14034 leh nuai 76 a ni a ti a, hetihlai hian kumin vêk 2024-25 (Revised Estimate) ah chuan state leiba chu Cheng Vbc 13030 leh nuai 82 a ni tih sawiin Cheng Vbc 1003 leh nuai 94 zetin a tla hniam tih a sawi.

Pu Lalduhoma chuan Health Care Scheme atana kum kal meka an dah Cheng Vbc 20 chu Cheng Vbc 50 ah an tisang a ti a. State Lottery atanga an hmuh Cheng Vbc 20 an dah thin bakah Cheng Vbc 30 belhin Cheng Vbc 50 chu dah ani tih sawiin medical reimbursement atana Department hrang hranga allocation an pek bakah, Cheng Vbc 100 an ruahman a ti a, hei hi Sawrkar hnathawkte’n medical bill rang zawka an lak theih nan leh, medical bill tling khawm tam lutuk thin pumpelhna atana ruahman a ni a ti a, Mizoram Universal Health Care Scheme chu kumin April ni 1 atanga kalpui tan an tum tih a sawi bawk.



STATE UNIVERSITY BILL

Mizoram Legislative Assembly thutkhawmah The Mizoram State University Bill, 2025 chu vawiin khan House in lungrual takin a pass.

Bill puluttu, Minister Dr.Vanlalhlana chuan NEP hnuaiah state university chu an duh vang ni lovin din a ngaih zawk avang leh zirlai zirna sang zawka seat chang lo zirlaiten zirna sang zawk an belh ve theihna turin state university chu din a tul tih a sawi a ni.

Sorkar hmasa khan kum 2023 August ni 16-a bill drafting committee an din a, hmun danga state university an kalpui dan te ngun taka an zirchian hnuah The Mizoram State University Bill chu kum 2024 December ni 22-a Council of Ministers thukhawm chuan Assembly Session hmasa bera pharh turin a pawm tih a sawi a. Ram pumah state university 481 a awm mek a, Mizoram leh Nagaland chu hmarchhak state zinga state university la nei ve lo awmchhun an ni tih a sawi a, kum 2035-ah chuan Mizoram university chu research university a nih tawh dawn avangin college nen a affiliate theih tawh dawn lova, chuvang chuan state sorkar leh private college te lo kuah khawma lo buaipui turin state university an mamawh dawn tih House a hrilh a ni.

He bill hian Mizoram State University chu state sorkar resource neih sa hmang tangkai tura duan a nih thu a sawi a, a hmingah Mizoram State University tih tur a ni a, a thuthmun chu Aizawl niin, a thuneihna huamchin chu Mizoram pum a ni dawn a, Chancellor atan Chief Minister a ni dawn a, Pro-chancellor-ah Higher and Technical Minister a ni dawn bawk a, state sorkar hnuaia college te chu university constituent college tih vek a ni dawn

bawk a ni. He bill ina a tum ber chu zirlaite tan chhawrnaawm taka zirna chhawp chhuah a ni.

Sawihonaah hian ZPM MLA H. Ginzalala chuan he bill hi a dodal lova chutih rual chuan a thuthmun tur Aizawl a ni chu a thlawp loh thu a sawi a, hmasawna chuan Aizawl pawn te pawh thleng ve tawh se a duh thu sawiin, tunlai thiamna sang zawk leh ram changkang te tih angin hmasawna chu rualkhai taka kalpui a duh tih a sawi a, Mizoram state university tih chu Mizoram University hming nen a inan em avangin Zo University ti-a phuah a rawt bawk a, BJP MLA Dr K Beichhua pawhin Aizawl khawpui chu a tawt tawh em avangin Mizoram state university thuthmun chu Mizorama laili lai ber, Lunglei a sawn a rawt a ni. He bill member hrang hrangin an sawiho hnuah House chuan lungrual takin a pass ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan industry tenau MSME ten ram eibar hmasawna atana an thawhhlawk zia tarlangin sawrkarin mahni intodelhna ram hmahlira nei chungin a thawk mek tih a sawi. Union Budget chungchang sawizauna internet kaltlanga neihah Prime Minister Modia chuan he thu hi sawiin insiamthatnate, sum leh pai renchemte, langtlang taka sum hmante, leh mitin huap hmasawna turin theihtawp chhuahin kum 10 chhung a lo kal tawh thu a sawi a. MSME te chuan ram eibar hmasawn nan an thawhhlawk em em tih a sawri bawk.

(Byte)

Pu Modia chuan sumdawnna ti awlsam turin sawrkar chuan ruahmanna thar tam tak a siam tih sawiin Union Budget ah pawh thilsiam chhuah leh thawhchhuah lam tih hmasawna tur tam tak telh a ni a ti. PM Modia chuan industry hotute chu khawvel bungrua chetvelnaah thlirtu mai nilovin remchanna thar zawng thiam turin a chah a. Bungraw thar siam chhuah kawngah tan la tura chahin khawvel mamawh thilte siam chhuak tam turin a chah a ni.

<><><>

US PRESIDENT

US President Donald Trump chuan Ukraine sipai tanpuina pek zawng zawng a chawhltir. White House thuneitute sawidanin US duh ber chu remna anih tih President Trumpa chuan Chiang taka lantirin he a thiltum hi an thawhpui ramte pawhin an thlawp a duh tih an sawi a. Thuneitute chuan US Ukraine a puihna a titawp rih tih sawiin buaina ti reh turin tanpuina hian kawngro a su em tih an ennawn tih an tarlang a ni.

<><><>

MAHARASTRA

Maharashtra sawrkara Food, Civil Supplies and Consumer Protection Minister Dhananjay Munde chu vawiin khan a nihna atangin a bang. Minister hian Chief Minister Devendra Fadnavis hnenah banna a thehlut a. Pu Fadnavis-a chuan Pu Munde-a banna hi a lo pawm sak thu sawiin Governor C.P Radhakrishnan hnenah bawhzui turin a thawng nghal tih a sawi a ni.

Minister ban chhanah hian Beed district-a Massajog khaw hotu Santosh Deshmukh thahnaah a thawhpui hnai tak a tel tih finfiah a nih vang nia hriat a ni a. BJP MLA leh Opposition Party te chuan Pu Munde-a hi bang turin nga takin an nawr bawh a ni.

<><><>